



Martes, 30 de mayu del 2017

El Gobiernu d'Asturies redefine l'área infestada pola poliya guatemalteca en Cuideiru y declara zona tampón los conceyos de Pravia y Muros

- La Consejería de Desenvolvimientu Rural yá punxo 182 trampes de les 255 que cunta instalar

La Consejería de Desenvolvimientu Rural y Recursos Naturales aprobó una redefinición de llendes p'aplicar el programa d'erradicación de la poliya guatemalteca (*Tecia solanivora*) na redolada del focu aisláu de Cuideiru. Esta remodelación, que s'adopta a la vista de la evolución de la plaga, va salir publicada llueu en *Boletín Oficial del Principáu d'Asturies (BOPA)*.

Con esti cambéu, incorpórense al área yá delimitada delles parcelas adicionales onde'l trampéu revela la presencia de la plaga, p'asegurar l'actuación sobre tol focu. Trátase de tierres apegaes en Cuideiru y nuna superficie pequeña del conceyu de Pravia. Como prevención, tamién s'incluyeron na zona tampón los conceyos de Pravia y de Muros. Esta midida adoptóse en coordinación colos conceyos implicaos.

Esti axuste ye resultáu del análisis intensivu realizáu sobre los trés únicos poliyeros onde la plaga amuesa anguaño actividá en tola comunidá autónoma. Trátase de les trampes allugaes en La Cuesta'l Cestu y Outeiru y en San Cristóbal (Cuideiru) y en Villamuñín (Pravia). Nenguna otra localidá ta amosando, hasta la fecha, actividá de *Tecia*, d'alcuerdu col programa de siguimientu que realiza la consejería.

El Gobiernu d'Asturies declaró en marzu zones infestaes pola *Tecia solanivora* cuatro conceyos completos: Castropol, A Veiga, Taramundi, y San Tiso d'Abres. Esta declaración tamién s'aplicó a delles tierres en Navia, Valdés, Cuideiru y Xixón, nun perímetru d'un quilómetru alredu de los focos alcontraos. La normativa incluye delles midies de control pa procurar desaniciar la plaga, amás de les indemnizaciones. Aparte, el Principáu definió como zones tampón los conceyos de Tapia, El Franco, Cuaña y Villayón y la superficie de los conceyos de Navia, Valdés,



Cuideiru y Xixón escluyida de la zona declarada como infestada, a los qu'agora s'añeden los conceyos de Pravia y Muros.

La normativa vixente incluye actuaciones de vixilancia n'otros conceyos costeros, de forma que los llabradores de Pravia, Muros, Sotu'l Barcu, Illas, Corvera, Castrillón, Avilés, Gozón, Carreño, Villaviciosa, Colunga, Caravia, Ribeseya, Llanes y Ribadeva notificaron los sos cultivos nes oficinas comarcales.

La consejería remató los trabayos de retirada y destrucción de tola pataca de semu nos conceyos declaraos infestaos dafechu. El volume total destruyó foi de 20.825 quilos, a los que se sumaron otros 13.574 de material vexetal, resultáu de la eliminación de tollos cultivos existentes en 44.299 metros cuadraos de terrén nos mesmos conceyos.

Hasta'l momentu, yá se punxeron 182 trampes, cantidá que va siguiu aumentando hasta les 225 previstes.

La consejería recuerda les normes de mercáu y comercialización de la pataca:

- Pataques envasaes. Han llevar con caracteres llexibles, indelebles y visibles, polo menos, estes indicaciones identificatives: nome, razón social o la denominación del envasador y/o del espedidor o del vendedor y, en tou casu, les señes.
- Pataques a granel. Nes presentaciones a granel son válides les indicaciones pa la pataca envasao, que tienen que figurar nun documentu qu'acompañe a la mercancía afitáu de forma visible nel interior de los sos tresportes o envases. Cuando los bultos s'apilen en palés, les indicaciones han figurar nuna ficha visible puesta polo menos en dos de los sos llaos.
- Los particulares tán obligaos a comunicar a la consejería los daños que tengan en pataca almacenao col fin de retiralo y indemnizalo.

Nos conceyos declaraos infestaos o con zones infestaes nel so territoriu:

- Prohibición del movimientu de pataques orixinaries y procedentes de la zona infestada, nun siendo que se faiga baxo control oficial con destín a la so destrucción.
- La entrada y circulación de pataques de consumu en zones infestaes ha realizase namás pal consumu directu y han dir preparaes y envasaes pal consumidor final. Prohíbese la comercialización de pataca a granel.



- El movimientu de pataques procedentes d'una zona demarcada ha acompañase siempre d'un pasaporte fitosanitariu, independientemente de que se produza dientro de la mesma zona demarcada de producción o pa fuera de la mesma.
- Los productores que comercialicen pataca tienen que tar inscritos nel Rexistru Xeneral de la Producción Agrícola.

Nes zones tampón:

- El treslláu de les pataques dende les tierres de producción con destín a la comercialización, incluyíu'l mercáu local, namás se pue realizar si s'efectúa una inspección visual por técnicos de la consejería nel momentu de la collecha pa comprobar l'ausencia de la plaga. Desque realizáu esti pasu, van poder destinase al so usu pa consumu.
- La fecha prevista de collecha ha comunicase al departamentu de sanidá vexetal de la consejería con, polo menos, una selmana d'antelación.
- La entrada y salida de pataca nuna zona demarcada ha realizase namás en contenedores zarraos o cubiertos con una maya.
- El movimientu de pataca procedente d'una zona demarcada ha acompañase siempre d'un pasaporte fitosanitariu, independientemente de que'l movimientu se produza dientro de la mesma zona demarcada de producción, o pa fuera de la mesma.
- Los productores que comercialicen pataca han tar inscritos nel Rexistru Xeneral de la Producción Agrícola.

Delimitación nueva de la zona infestada por *Tecia solanivora* en Cuideiru con indicación de les zones tapón axacentes de Pravia y Muros.

